

**Unterrichtu[...  
Warumb die ee  
uß  
me[n]schlich...  
gsatz in vyl ...**

**Johannes Zwick**

4<sup>o</sup> Th. van R. 989.

Zwick . 8.



Frased: Vel. Curis od. Andrews Crater, num. 1524



**Vnderrichtug** Wa-  
rumb die ee vñ mēschlichem gsatz  
in vyl grad verbottē sey / vñd das  
die vereeingē göttlich geschehē/  
vñd aber von dem menschen  
vngöttlich zertrent / wi-  
derumb sollind be-  
stätigt wer-  
den.

Joannis Trüch von Costenz / an  
all Ch. istenlich pfarther.



Matthei am zehenden/  
Förchtend euch nit vor denen/die den leib  
tödtten/vnd die seel nit mügē tödtten/  
förchtend euch aber vyl meer.  
vor dem/der do vermag/  
leib vnd seel verder-  
ben in die  
helle.

Allen Christenlichen pfarthern/wünsch ich  
Johannes Swick/gnad vnd fryd  
in Christo vnserem herrē.

**L**eben brüder Christi. Nach dem ich by  
meine liebe vnderthone zu Rüdlingen/  
ain vereung / so durch also gnept geyst  
liche recht zertrēt / widerin bestetiget vñ  
göetlich erkent hab / ist mir / nit von den  
meine / die solichs in großer danckbarkeit von mir an  
genommen / sunder von etlichen geistliche nachpauren  
vyluelichlich / als einem kezer / vñ büßen nach geredet  
worden / das ich mich doch wenig hab lassen beküme  
re / gedacht der wort Christi / das mir salig sind was Matth. 10.  
vns die menschen schmechend / vnd allerley args wi  
der vns reden / so sy daran liegen vñ synen wille. Als  
ich aber erkent / das ich durch die selbigē / by vil Chri  
stenlichen hertzen möchte verunglimpfet werden / so  
sy nach irem vrteil myn größe vermessenheit dar ge  
bind / sagend / wie ich wider den stül zu Rom / wider  
alle bapstliche gsatz / wider vrteil vñ recht / mit freuen  
licher verachtung meiner oberen / gehandelt. Dan diß  
vnd der geliche wort by vyl menschen ein groß anse  
hen habend. Darum ich ein informacio / oder vnder  
richt gemacht / vnd etlich einfeltig / doch war artikel  
daraus zogē hab / zu entschuldigē / das ich nit wie mir  
zugelegt würdt / freuelich / sunder auß grund vñ Chri  
stliche vrsache gehädlet hab. Dan also müßend mir  
nit nach alte verlegne hertume mit blossen worten /  
sunder nach dem ewigblybende wort Christi / mit hi  
melischem verstand / etwas recht oder vnrecht / wol  
oder übel gehandelt / vrteilē. Die selbig informacion

schryb ich euch zu/da mit ir erkenind ym grund/wie so  
vyl göttlicher vereungen / allein auß menschlichen ar-  
gen sünden vngöttlicher wiß geschaidē werdendē / vñ  
das ir gegen euweren bevolchnen schafflin nit hand-  
lend/wie ich von etlichen meinen nachpaueren erfaren  
hab/die gegē ynen thünd glich sam/als ob sy nit gnüg  
wtimülīg syind die selben zu verschlinden / sunder das  
ir der grossen not/so sy in vyl weg leiden müssen / mit  
Christenlicher dapferteit/wie ir dann vor got schul-  
dig sind/zū hilffkumend.

Artickel auß nachvolgender informa-  
tion/als für ein summa:  
ri gezogen.

- 1 Die gesatz gotz müßend ewig bleibē / vñ sol ynen mit-  
hinzū oder von thon werden.
- 2 Das gsatz gotz erzelt ordenlich all personē/ denē sich  
zū vereen verbottē / vnder welchē die fründschafft  
deren so ich zū samen geben/nit begriffen ist.
- 3 Darauf volget das sy von anfang irer vereung/  
vor gott eeleüt/vnd also nit me zwey/sunder ain  
fleisch gewesen sind.
- 4 Der ewig sin gotz Christus sagt/was got zū samen-  
füg/müg der mensch nit scheiden.
- 5 Darauf volget/das sy vor got alweg eeleüt beliben  
sind/vnd die zertrennung der geistlichen synagog  
nit auß



- mit auß dē wort gotz/sunder darwider gewesen ist. 11
- Welche die gerechtikeit/volkomme/vñ das übertref- 6  
fen des nūwē testamētz / mit vyle mēschlicher auff-  
satz vsrechnēd / die schmehēd Christū vñ syn wort.
- Welche sagen das die wort Christi / so er zū sinē iun- 7  
ger sagt/er het noch vyl mit ynē zū redē/das sy yetz  
nit tragē möchte / der geist wurd sy aber leren etc.  
auch die wort des Euangelistē Joānis / so er sage  
das nit alle ding im Euangelio begriffen synd etc.  
sollind vō der weltlichē philosophē / vñ geistlicher  
Juristrey verstandē werdē / die übelredend der hei-  
ligē drineltikeit/vñ vor auß dē heiligen geist gottes.
- Was die Christenlich kirch/ nach der geschriffte auff- 8  
setzt / das sol als warhafftig ghalten werden. was  
der geschriffte aber vngemes / das soll als lugnerey  
wyt verworfen werden.
- Diß menschen gsatz / das vorgemelter oder gleycher 9  
gestalt die ee verbüt / hat kein gegrünzte vsach / ist  
auch nit anders/dan der eer gottes nach/ein verge-  
bnei/seiner gestalt/vnd der geschriffte nach/ein hof-  
fertiger/wanckelmietiger/vnwaret aigensfund.
- Diß menschen gsatz ist dem gewyn vnderworffen. 10  
Dan welcher gelch hat/der mag söllichs lösen. Also  
spricht der procurator/ lieben fründ ir sind mit  
recht vñ vrtail gescheiden / wo eüch aber not zū sa-  
men wer/möchtend ir mit x. oder xx. duggaten(dar  
nach dann die schatzung ist)gen Rom werbē 2 c.  
a ii

- 11 Meine vnderthone so ich zu samen gfügt/ haben diß  
recht nit vermög zu lösen/ deßhalb ynen vnrechte  
gewesen/ vnd ir verecung nit dan armüt gehinde-  
ret hat.
- 12 Die trecheren der armen also gescheidnen/ steigend  
auff von iren kinbacken biß in himel/ so sy also spre-  
chend/ Synd mir nun vor gott celeüt/ vnd sollend  
doch von deß gels/ vnd vnser armüt wege geschei-  
den sein/ das sy geklagt dem barmherzigen gott.
- 13 Christus sagt/ welcher de minsten auß den seinen ein  
ergernus geß/ dem werd nutz das man ym ein ni-  
lest ein an den hals hencet/ vñ werff in in das meer  
do es am tiefften sey.
- 14 Die verecungen aber/ vor gott erkennen/ vñ doch wi-  
der gott scheiden/ vñ so die bezalung geschehen ist/  
widerü vor gott erkennen/ ein ergernus ist über er-  
gernus.
- 15 Die verecungen göttlich geschehen/ vs menschliche  
gsatz zertrennen/ heist nit anders dann die sünd  
deß ebruchs fürdern/ eerlich bywonung schme-  
chen/ wirwen vnd waisen meerē/ wyb vnd kinden  
ir eer vñ güt abschneiden/ vnd in summa/ die liebe  
gots vnd des nechsten mit füßen treten.
- 16 Die pfarher die mit zeitlicher reichum/ vnd rir-  
warnemend/ ire vnderthone mit höchster liebe nit  
weidend/ den wölffen vnd wölfschen gsatz nit wi-  
derstond/ die werden von der geschriffte brüled lö-  
wen

wen/reißend wolff/stummer hünd/blind vñ blindē fü  
rer/verdäp̃t mietling/dieb vñ möder/vnd mit vyl  
der glychen eerlosen titel gewirdiget.

Darum ein yeder Christenlicher pfarrher gott bitte  
soll/sich durch syn gnad/vor söllicher vnseeliger  
gfselschafft zü behüten/vnd beschirmen/Amen.

17



V dem aller ersten mag niemād wider  
sprechen/dann das die gsatz vnd wort  
gottes/ewigklich be Leibend/vnd von jm  
nimmer widerrüfft werdend. Dan we  
der himel noch ertrich/also gefestiget  
sind/sy werde zergon/aber die wort gots werde nim  
mer vergon. Ja auch der klainest titel oder bñchstab  
würt da vō nit fallē/es würt sich ee himel vñ ertrich  
verkeren. Da von die heilig gschafft allenthalb über  
flüssig zūgnus gibr.

Das  
wort gots  
blibt ewig

Matth. 24.

Matth. 5.

Es soll auch disen wortē vñ gsatzē gottes/nüt hin  
zū oß vō thon werde. Dan so got ein erkēner aller her  
zen vñ ytzē/wol gwist das vileicht etlich einer solichē  
hoffart vñ aigēsinnikeit sin würdet/die sich nit schā  
tend/seine himelische wort vnd gsatz/srem yrdischen  
willen vnd wolgsallen vnderwersen/hat er söllichs  
in sunderheit verbotten. Also sagt er dem volck von  
Israel durch Moysen. Weret Israel auff das urteil  
das ich dich lere/du solt nüt hin zū thūn dē wort das  
ich zū dir red/vñ solt auch nüt da vō nemē. Darnach  
erinneret er sy noch ein mal des selbigen/sagt. Was  
ich dir gebiet Israel/das selbig allein thūn dē herren

De wort  
gots soll  
nüt hin zū  
oder von  
thō werde.

Deut. 4.

Deut. 10.

vnd thū nit etwas hinzū/vnd nym auch nit darvon.  
**Prover. 30.** Söliche hat er auch durch dē Salomonē / doch mit  
 ernstlichem wortē gedöffnet/so er spricht/Alles reden  
 vnd alles wort gottes/das ist ein füriner schilt allen  
 denē die in jn hoffend. In den selbē thū nit/nym auch  
 nit darvon / das du nit als ein lugner gefunden vnd  
 gestrafft werdest. Da sollend mir vns ernstlich hū-  
 ten / damit mir nit aincherley weg/als widerspen-  
 nig der göttlichen gschafft erfunden werdind. Wir  
 sollend erschreckhen/vnd vns übel fürchten diß aller  
 erwürdigest hailtun der verlasne wort gottes mit  
 vnseren vnreine henden anzürerē. Dann aller men-  
 schen synn vnd denck/wort vñ werck/sind gegen den  
 göttlichē synnen vnd denckē/worten vnd werckē nit  
 dan lugnen. Welcher auch spricht das den wortē vñ  
 gsagen gots / müg hinzū oder von thon werden/der  
 muß auch sagen das gott in den selbigen vnuoltomē  
 sye/ also das sy etwā zū vyl habind/damit man dar-  
 von/etwan zū wenig/damit man dar zū thū/welche  
 doch der hochwisi Salomon lugner vnd straff wür-  
**Num. 22.** dig nēnet. Darū mir alweg mit dem Balaa sprechē  
 sollen / wan der künig Balach vns seyn hauß vol sil-  
 ber vnd gold geb/so mögē mir das wort gots vnser  
 herren nit verwandlen / das mir mee oder minder  
 redind.

Von ver: Nun habend mir ein gsatz gottes/daryn ordēlich  
 botnen per all personē erzelt werdē / denen sich vnder ein anderē  
 sonē nach vereen verbotten ist/die selbē yetziger zeit yederman  
 dem gsatz wol weißt/defhalb vnnor hie anzuzeigen. Allen denen  
 gottes. aber so vñ den selbigen personen nit begriffen synd/  
**Leui. 18.** denen ist auch die vereeing nit verbotten/wie wol et-  
 lich

lich sölllich gsatz gotz vnzinstossē/ inredēd/ wie dē gsatz  
nit also müg gelebt werde/ dann sinst volge das der  
vatter syn dochter beschlaffe müg/ die wyl die selb vn  
der dē verbornē personē nit begriffē sye. Also verkere  
synn habend ettelich/ das sy sich nit fürchten den gsaz  
zen gotz gwalt thün/ damit jr eigensinnikeit ain für  
gang hab. In welchem/ so sy ettwan ghindret werz  
den/ ergrimmēd sy sich/ das sy garnach von verstād  
kündend/ kērend jr ghōr von der warheit zū vnwar  
heit/ treibend eckbrüchery mit der gschriffte/ vnd mūz  
dery mit jren aigenfunden. Wer than aber also vn  
uerstendig syn/ der nit wisse/ so die stieffdochter/ das  
auch die recht dochter verbotten ist/ mir zū vereen/  
gleichsam als einer auch spricht/ wann nachgelas  
sen syn solle was nit verbottē/ so müge mā auch krieg  
pruchen/ dan kriegen sey in dem Ewangelio nit ver  
botten/ der ist ye mit dem vorderigen glyches vnuer  
stands/ vermeint darū das in dem Ewangelio von  
hauptlütē/ kriegsknechtē/ senderich/ büchsen/ spieß  
sen trummen vnd pfiffen/ vnd der gleichen nit gschri  
ben stand/ syend sy nachgelassen/ so doch die erst vr  
sach deren ding aller verbottē ist. Nämlich der zorn/  
gschwigen des todschlachens. Aber vñ denen vnd der  
gleichen argumenten/ können mir erkennen/ wie so  
gar nüt zū buwen ist vff vnser menschliche künst vnd  
wissen/ das vns also zū schanden macht vor got vnd  
der welt/ dann allein göttlich künst/ vñ himelisch wiß  
sen mag vns vor aller schand beschirmen. Darum  
mir alweg allen vleiß vñ ernst ankeren sollen/ zū blei  
ben bei den gsätzen vnd Worten gottes/ so mir ache  
vns selb nit verführen/ vnd mücwillig in die strick der  
vnwarheit geben wollen.

Matt. 3. 17.

Was gott  
zusamen  
fügt etc.

Matth. 19.

Gene. 1. 2. 11.

Ephc. 5.

Wytter habed mir ein wort Christi vnfers heren/vn  
aller uolkomesten maisters / vor welche sich al jrdisch  
vnd hellisch schulen fürchte sollen vnd müßend / dan  
er ein einiger doctor ist / nit von jrdischem gschwetz/  
zu jrdischer choheit / on kunst / mit silber vn gold / sin  
der vñ himelischer stim / zu göttlicher leer / mit vnusspre  
chlicher weißheit / als ein aller geliepster / vnd wolge  
felliger sun gots / beriefft vnd erwelt / der in alweg  
volkomenlich leeren wurd / das do diente zu dem heil  
alles menschliches geschlechts / darum auch gepotten  
ward in zu hören. Zu dem selben tratten vñ ein zeit  
die geschrift gelerten / vnd geistlichen ordenslute /  
versuchend in vnd sprachend / ob es recht were / das  
sie ein manscheidete von seiner efrowe. sagt er zu yn  
Habt jr nit gelesen / das der in dem anfang den men  
schen gmacht hat / der macht das ein weib vnd man  
sein solt / vnd sprach / darum würt ein mensch vatter  
vnd mütter verlassen / vnd an seinem weib hangen /  
vnd werdend die zwey ein fleisch syn. so sind sy nun  
nit zwey sind ein fleisch. Was nun gott zu same gfüge  
hat / das soll der mensch nit scheide. Diß sind nun wort  
vñ dem mund der ewigen warheit geschlossen / vor de  
nen sich die bischoff / als vor einem erschrockenlichen  
tunderschlag fürchten / vnd erzitteren soltend / vñ sich  
lassen lebendig schindē / ee vnd sy wider diß wort got  
tes ein vereining göttlich gscheche zertrenten. Dan  
an dē anfang der welt hat gott die ee also gefestiget /  
vnd zu samen gefügt / das weib vñ man yetz nit mee  
zwey / sunder ein fleisch werdend. Also ein verborgnen  
vnd grossen gwalt hatt die vereining zweier men  
schen in jr / das sy vñ krafft göttlicher wortē ouch wir  
der die natur wirckt. Darzu wyter wie wol mir durch  
das

das gsatz gepotten ist/ mein vater vnd mitter in eeren  
 zûhaben / noch dannacht übertrifft das wort göttli-  
 cher vereenig/ vnd heist mich vatter vñ mitter verlass-  
 sen/ ee vnd ich mich laß von meinem weib zertrenne.  
 Christus gibe dem mit kurzen worten/ aber mit gro-  
 ßem ernst zûgnus/ vnd setze ein spruch also/ was gott Matth. 19.  
 zûsamen fügt/ mag der mensch nit scheiden. Vñ dem  
 allen volget/ das ein göttliche ee zertrennen erstlich  
 wider gott ist/ der man vnd weib geschaffen/ vnd sy  
 als jertz ein leib vnd ein fleisch zûsamen gfügt. Dar- Wiß gott  
vnd natur  
die ee zer-  
trennen.  
 nach ist es auch wider die natur/ dann als vnnatür-  
 lich ist/ gelider von dem leib abschneiden/ oder sunst  
 menschlich fleisch zerrißten/ also vnnatürlich ist vor  
 gott ein ee zertrennen. Es ist auch wider das wort  
 Christi vnseres herren/ von des stamen vnd namē  
 mir alle Christen menschen genempt sind/ der sagt  
 was gott zûsamen fügt/ müg der mensch nit scheide.  
 Also habend mir nun das gsatz gottes/ in welchem  
 die personen/ denen sich zû vereen verbotē ist/ orden-  
 lich begriffen werde/ darnach die wort Christi in de-  
 nen er vns verbüt göttliche vereenigen handanle-  
 gen/ darzû auch die gschrifft/ die vns lert dē göttliche  
 gsätzen mit hin zû oder von thûn. Das alles ist/ das  
 mir vnser lebē/ all vnß thûn vnd lon/ wort vnd weick  
 nach der göttliche gschrifft/ vñ nit die gschrifft nach  
 vnserm leben ordnen sollen/ das mir auch mit füßen  
 tretend vff all vnser kunst/ wißē/ vnd vermögē/ vns  
 allein mit allen krefftē gebind vff die wort/ des/ der  
 alle ding in der warheit allein weist vnd vermag/ ge-  
 gen welchem all vnser vermögen mit ist dann on-  
 macht. All vnser verstād mit dan blindheit/ narheit/

vnd die aller höchst vnuerstendikeit.

Wie wol nun diß die recht klar warheit/ yetz vnd  
alweg gewesen ist/ noch danacht/ wie der böß veind  
sich alweg gestiffen/ gott seine wort vnd werck hin-  
der sich zū stossen/vnd jm glich/ ja auch über in zū sin  
also hat er auch hie gethon/vnd mit mancherlei wun-  
derbarlichen sünden/ die gschrifft ietz oben anzeigt/  
verfinstere/vñ zū ruck geworffen. Also geltē Moy-  
ses vñ Salomō gar nüt/ die so ernstlich verbotē ha-  
bē/den gfangē gotz etwas hin zū oder vō thūn. Wan  
den personen/denen nach dem gsatz gottes sich zū ver-  
een verbotten ist/ noch vyl mee hinzū thūn sind/nam-  
lich alle die im vierten/fünfften/sechsten/vnd sibenden  
grad einander verwandt sind/ vnd sunst ander per-  
sonen meer deren ich von kürze wegen hie geschwey-  
gen wil. Also wurt auch gott mit seinen Worten ver-  
nichtet/ soer sagt Vatter vnd mütter sollind mir ver-  
lassen/ vnd vnseren weibern anhangen. dann vyl  
menschen mancherlei weg zwingē werden ire eewe-  
ber zū verlassen/vñ yrdischen aigensinnigē sationen  
anhangen/ ja eelicher beivonungē müßend mit ver-  
leügnen/ vnd tūfelische bekennen/ wie mir dann yet-  
zund teglich erfarend/ mit der priester schafft. Wan  
einer spricht mit Paulo/ von schwacheit mynes  
fleischs hab ich ein wyb. vñ stundan würt er für die sy  
nagog geführt. so pald er aber schand vnd laster be-  
kent/ spricht sein wyß sy sin merz/ so ist er schon wider-  
tūm frey/ vnd allenthalben in gnadē der geistlichen  
oberherren/ vnd so Paulus sagt/von vnreinikeit we-  
gen/solle ein yeder sein aigen eeweib haben/so spriche  
man doch yetzund glich darwider/ vō bāpfflich gsatz  
wegen

Vyl müs-  
sēd jz aigne  
schand be-  
kennen.



wegen / vnd wie eelich noch vnuerfchemppter fagen/  
von der kirchē wegen / sol man keine eewyber haben.  
Daruß dann volget groffe vnd vnchristliche vnreini  
keit / die mir täglich vor augen sehend. Also wirt das  
wort gortz greülichē vmgestoffē / daß so mir nit allein  
schand / sunder auch vatter vñ mütter verlassen / vnd  
eelicher Beirwonung anhangen söltend / so müßend  
mir weib vnd kind / vnd alle eer verlassen / vnd dem oß  
disem menschlichen aigenfund anhangen / vnd vns  
ser aigne vneer / vnd schand verjehen. Auch so Chris  
tus sagt / was gott zu samē füg / müg der mensch nit  
trenne . will also das der mensch gar kein gwalt hab  
über die göttlichen wort vnd sayungen / noch dan  
nacht sehend mir täglich wie so vyl hündert göttlicher  
vereeungē zertrenē werden / vñ nit geduldet / so lang  
vñ die mit gelt nit erkaufft synd / dazü hat es der böß  
weind pracht durch die verdäp mēschlich vernunft.

¶ Nun wie mir vor oben / von dem wort vnd gsatz Volget vñ  
gotts geredt habē / also wöllē mir yetz hernach von dem men  
dem wort vnd gsatz deß menschen auch reden / vnd schē gsatz.  
warnemmen vñ was grund vnd vrsachen die men  
schen bewegt syind worden / dem gsatz gortes hin zu  
thon / vnd die ee biß vff den sibenden grad verbieten.  
Vnd so man die grosen schuld ocker deßhalb fraget /  
antwortē sy / das es nützlich / gschickt / vñ billich gwe  
sen / darum hab es die kirch also geordnet / das die ver  
eeungē in dē viertē / fünfftē / sechstē vnd sybendē grad  
der frundschaft soll verbotten sein / da von mir dan  
jegund nachgend fagen wellend.

¶ In dem erstē. Daß es nützlich sie / zeigend die schül

Dasz nütz doctor erstlich vrsach an / dann die liebe vnd frund  
lich sie die schafft vnder den menschen solle gemeret werden/  
ee in vil welche aber einanderen von dem geplüt verwant  
grad ver: syind/die habind sunst fründschafft/vñ liebe zusamē  
bieten. darumb güt sy/das dise fründschafft vnd liebe wyrt vñ  
in vil grad vñ gespreit werde. Dise vrsach ist an j: selb  
nit böß/das aber von der wege ein port gemacht ist/  
die vereunge göttlich geschehen/widerū von wege  
menschliches gsatz zerrennē/darzu vil armer gewis  
sinē verderben/das than aincherley weg nit Christe  
lich sein/wie mir dan altag ougenseinlich ersarēd/  
das die armenlüt die sich einanderē göttlich verspro  
chen/vnd daruff ouch beigeschlaffen/ouch vil jar bei  
gewoner/widerum von den menschen gschieden wer  
den / vnd sy durch solliche menschē gsatz in vil not vñ  
jomer/darzu in ein sündige gewissne fallend/von der  
jm nit mag gholfen werden/dann durch die schatzung  
so hieruff gelegt ist. Darū ich sag das in dem sal diß  
vrsach nit meer dann ein schein hatt aines güten/da  
von vil böß entsprunge ist / Oder solt doch ye nach jrer  
meinung/söllich gsatz vñ gott syn/von wegen yetzge  
melter vrsach / der liebe/truw/vnd frundschafft/wo  
rum nimpt man dann gelt/vnd dispensiert wider die  
liebe/truw/vñ frundschafft: Würt geantwortet/die  
vnd der gleichen dispensation werdind nit on vrsach  
nachgelassen/so würt auch war das ich sag/das an  
geschehen eben der selbigen vrsachē/nit solt ein sollich  
gemein hert gsatz gemacht syn / durch welches die  
menschen also vnleidenlich an jren hertzen / vnd gü  
tern beschwert wurdind. Darzu/wan dise vrsach als  
so gnügßā syn solt die ee zünerbiete/so wölt ich raten/  
das noch mee grad dē menschē gsatz hinzu thon wur:  
dind

sind/also/ das keine nachpauen/ auch keine burger  
sich vndereinander möchtind/ sunder das man sich  
vß einer landschafft in die ander müß/ vereen/ das  
wurd dem tüfel wolgefallen/ damit dem gsz gots  
noch weiter hin zu thon wurd/ vñ die geistliche ober-  
herren/ abermals vnder dem schyn gemeiner frumt-  
schafft vnd liebe/ durch vyl dispensieren noch reicher  
wurdind. Nit das diß gsz (nach meinẽ vrtail) erst-  
mals von gwins wegen vffgesetzt sie/ aber der tüfel  
kan wol etwas vnder einem vast gütẽ schyn fürge-  
ben/welchem so man nit ganz ernstlich vnd mit ver-  
stand nachgedenckt/ mag söllichs zu großem nach-  
teil raichen/vnd vffiezigen tag/mag er etwas nach  
vnserem ansähe/als ganz Christlich fürgebe/ das  
nach vyl jarẽ tüfelisch erfunden würt/als mir leider  
täglich jezũd erfarend/wie vñ vnserẽ älteren/so vyl  
in allem besten angesehen/ das doch zu schwerem  
nachteil dienet der liebe gots/vnd des nächsten. Das  
rumb kein sicherer weg syn künd/ dan vnser eigen ver-  
müßft anspürwen/ vñ allein vff die götlich gschrift  
acht haben/die dann ein ewige luccẽ syn solt vnsern  
füßen vnd ein liecht vnseren füßeritten/ da mit mir  
sicher wandeltind/ wie dann Christus sagt/wer an  
dem tag wandlet der stost sich nit/ dann er hatt das  
liecht/wer aber in der nacht/der stost sich/dann das  
liecht ist nit in im. Ich glaub die liebe vnd truw ge-  
gen dem nächsten wurd fruchtlicher gemeeret/ vor  
predigen des wort gottes/vnd gütẽ exempel geistli-  
cher oberkeit/ weder durch menschlich aigenfınd/  
dann onzweifel/ was das wort gotz in dem menschen  
nit würckt/ das werde yrdische menschliche wort vyl

Listigkeit  
des tufels.

Psal. 118.

Ioan. 12.

weniger würcken. Das sye nun gsagt von der ersten  
vsach / das vñ. disem gsatz grösser nutz entsprungen  
solt. Von dem nutz deß dispensierends waist alle men  
schen wol züsagen / den nutz aber der liebe vnd trüw  
vñ disem gsatz entsprungen / haben noch nit vyl erfar  
ren 2c.

Wie Billich Zu dem anderen / würt vsach anzeigt / das nit al  
sye die ee in lein / wie jetz gsagt / nützlich / sunder ouch gschickt vñ  
vyl grad billich gewesen sye / die verecungē nach vil gradē vñ  
verpieten. zürechnen / dan von dem vierten grad / sagend die  
schüldocter selb / das fründtschafft sy vñ dē geschlecht /  
Vrsach das geschlecht sy auß dem somen / der som us vier  
deß viertē elementen / so nun der mensch vñ vier elementē / so sye  
grads. also Billich / das sich der mēsch / vñserthalb dem viertē  
Des sechs grad der fründtschafft vermechle. Von dem sechsten  
ten. grad sagend sy / das ein mēsch sechs alter habe / darū  
auch Billich / das die fründtschafften in sechs gradē be  
Des sybē griffen werdind. Von dem sybenden grad / sagend sy  
den. der glychen / nämlich das alle zeit in syben tagen vol  
bracht werde 2c. Diß vrsachē / was sy für ein ansechē  
habind / kan auch ein weniguerstediger wol merckē /  
wie sy nüt sind dann ein menschen chant / nit allein  
vngnügig / ja auch vnwürdig / das aincherley gsatz  
daruff solt gebuwē werdē / dan wo gnügig wer sol  
lich vrsachē erdichtē / möchte ich abermals wol raten  
das man dē gsatz noch meer grad. hin zū sagte Biß  
vñ den zwölften / von der zwölfpotten wegen Christi /  
oder vñ den dryßigsten / von dryßig tag wege etlich  
er moner / oder auch vñ so vyl grad als tag ym jar  
sind / damit man gnüg zū dispensieren het vñ gwins  
willen. Vnd sind auch etlich schüldocter / Albertisten  
genāt /

genant / die diß vrsachē selb verwerffend vñ verspotz  
 tend / sprechēd / warū der vierd grad nit als billich vñ  
 den vier thierē / da vñ Ezechiel sagt / als von den vier Ezech. 1.  
 elementē vffgesetzt sie / vñ der sechst von den sechs stei  
 ninen wasserkrüge vff der hochzeit zu Chana in Gali Ioan. 2.  
 lea / vñ der sibent von den siben planeten 2c. Vñd sol  
 doch vff dise vrsachē ein sollich groß schwer gsatz ge  
 purwē syn / das / wie wol der ewig got sagt / wie ich vor  
 obē anzeigt hab / das eemenschē nit mee zwey / sunder  
 ein fleisch syind / das mir vatter vñ mütter verlassen /  
 vñ vnsern eweiberē anhangē / das die er zusamē fūg /  
 von dem menschen nit sollind gescheiden werdē / das  
 mir hilfflich vñ rätlich syind den armen verlassnen Hilff ewi  
 witrwen vñ weisen. Vñoch dannacht / gott vñ seine Ger gott.  
 wort hindersich gestossen / vierteilend mir vñ radpre  
 chend die armē emenschen / wie vnmilt nachrichter /  
 schlachēd gott in seinē gebenedeidten mund / vñ küß  
 end die abgöttereien / so vnser eigne hend erfunden /  
 als von wasserkrügen vñ anderē prestlosen vrsachē  
 wegen / daruñ dann Christenliche hertzen lernen sol  
 lēd / wie vns der teüfel so mit schimpfflichē / ja leichtfer  
 tigen dingen vmstost / da mit mir nit belybind in dem  
 rechten weg der gsatzten gottes / die mir dann gar  
 nach alle müßend überretten / von der blütrysenden  
 menschen gsatz wegen.

Zu dem dritcē würt ein vrsach anzeigt / allein des: Ein helli  
 halb würdig / von der man rede / da mit ein Christen sche vrsach  
 lich hertz weiter lerne erkennē / das / wie der teüfel die das die ee  
 gschafft gegen vnserm herrē Christo personlich miß in vyl grad  
 burcht vñ verfert / das er solliche ouch durch die sei. verpoten  
 nen vilueltig in der Christenliche kirchen langzeit ge: sin solle.

thon hat/ vnd der dem innerlich nach trachten wil/  
 der würt onzweifel also müd in seine hertzen werdē/  
 das er weder von anfang noch von end würt reden  
 können/ vnd ob er gleich wol vermeint zu reden/ würt  
 sollich mit bescheidenheit vnd maß kümmerlich gesche-  
 chen mügen/ also vnbescheidenlich/ vnd on alle maß  
 ist die götlich gschafft allenthalb fert vnd verfert.  
 Nun sagend die falsch genemten theology/ vnd doc-  
 tor geistlicher recht/ die gsatz des neuen testaments  
 sollind volkommer sein/ dann die gsatz des alten/ vnd  
 die gerechtikeit des ewangeliums/ solle übertreffen  
 die gerechtikeit des alten gsatz. Darum von den ver-  
 eecungen zu reden/ wie wol gott durch Moysen anzei-  
 get hab/ welche personen sich nit mügend vereen/  
 habind doch die bapst pillich meer personen vn grad  
 in mancherley weg hinzü gesetzt/ dann das ewan-  
 gelisch vnd new testament/ solle überflüssiger/ vol-  
 kommer/ vnd gerechter syn/ dann das alt. Nun wo-  
 lan almechtiger gott/ ewiger vatter/ hast du gepor-  
 ten/ das mir vns erbarmind über die dürfftigen/  
 vnd beweiniind das ellend vnser nachsten mitbünd/  
 wie sind mir dann so schuldig vns zu erbarmen über  
 diß volck/ vnd zu ersüßzen über sein blintheit/ das  
 so gar nit erkent was do sie die gerechtikeit/ volkom-  
 me/ vnd das übertreffen des ewangelischē testamēts  
 vns jetz zu den letzten zeitē verlassen durch Christum.

Mosai Wissend mir dan nit/ das/ das alt gsatz von gott ge-  
 ben dem menschen/ nimmer hat so gerecht vn volko-  
 men syn mügen/ das jemand da durch sällig wurde.  
 Es ist wol war/ das gsatz hatt etwas gerechtikeit ge-  
 hebt/ dan welcher dem selbigē gelept der ward geach-  
 tet als ein frummer gerechter man/ wie Paulus sage  
 Moyses schubt wol von der gerechtikeit/ die vs dem

gsatz

sche gerecht-  
 icheit.

Rom. 10.

gsatz ist/welcher mensch diß thut/würt darin leben/  
 Es hat auch etwas volkomens/dan das übel strafft  
 es/vnd belonet das güte/doch aber nit mee dan nach  
 irdischer wys. nach verzychung aber der sünd/vñ der  
 selbslücke/hatt diße gerechtikeit vnd volkomne kein  
 krafft/vñ wil jezund allein reden von der rechtfertig-  
 ung der gsatz gottes/vnd geschwigen der menschen  
 gsatz/die von den gschriftgelerten/vñ Jüdischen or-  
 dens lüten/ouch jren elteren erdicht/vnd den gsätzen  
 gottes hin zu thon waren/dan so vil gott me ist über  
 den mensche/so vil minder mügen die gsatz/vnd eigē  
 sünd der menschen/frum/grecht/oder volkomen ma-  
 chen. Darum dem menschliche geschlecht ein ander  
 nur gsatz not gewesen ist/das nit allein frum machte  
 in diser ytz vor der welt/sunder vor gott in das ewig  
 leben. der selbig weg ist vns eroffnet worden durch  
 Chrißtu vnsern herre/der mit seinē sterbē/die burde/  
 den mangel/die vnuolkomēheit/der altē gsatz von vns  
 genomē/vñ vns zu gepraht/das volkomē gsatz der  
 gnade vnd barmhertikeit. Diser Christus/vnd das  
 ewagelium/das er vns verlassen/ist die war grechti-  
 keit/die war volkomne/vñ das war übertreffe da vñ  
 der götlich. S. Pauls in allē seinē schribē vil sagt.  
 Von der gerechtikeit sagt er zu dē Galatern/wan sy  
 durch das gsatz wöllind rechtfertig werdē/so synd sy  
 ab vñ Christo/vñ habind der gnad gefelt. Vñ zu den  
 Römern klagt er sych für Israel/die vñ got yferind/  
 aber mit vnuerstand/dan sy erkenind die gerechtikeit  
 nit/die vor gott gilt/sünd trachtind jr eigene gerecht-  
 keit vff zu richē/darū sy der gerechtikeit/die vor got  
 gilt nit vnderthon synd. Vñ der volkomenheit oder  
 erfüllung spricht er zu dē Römern/das Christus sy das  
 end des gsatz/darā rechtfertig würt/wer do gloupt.

Gal. 3.  
 Ewange-  
 lische ge-  
 rechtikeit.

Ro. 10.

Ewange-  
 lische vol-  
 komēheit.

Aber die gschrifft hatt alle menschen warhafftig be-  
 schlossen vnder der sünd / vff das die verheissung kä-  
 me / die von gott dem Abraham thon was / durch den  
 glauben an Jesum Christum. Vnd das aber die recht  
 volkomme kam / der recht gloub / warend mir vnder  
 dem gsatz beschossen vff den glauben / der da solt ge-  
 offenbart werden / also ist das gsatz vnser schülmar-  
 ster gewesen biß vff Christum. Dusch so sind mir junge  
 kind gewesen / gleich den knechte / Biß vff die bestimpte  
 zeit des vaters / da nun die selbig zeit komen ist / vnd  
 Christus thon hatt den willen seines vatters / das ist /  
 das durch syn leiden die Ewägelsch gerechtikeit / vn-  
 volkomme in aller welt geprediget / vnd also (wie er  
 selb sagt) das werck gottes erfült / vnd vollendet ist /  
 sind mir entrunnē de züchtmeister / vnd sind ouch nie  
 mee kinder / wie knecht / sunder volkomme kinder got-  
 tes durch den glaube in Christo / vn so mir kind sind /  
 so sind mir ouch erben gottes durch Christum / durch  
 welchē / tod / hell / sünd / vnd all gepreste der welt vol  
 komelich hingnomē sind. Von dem übertreffen vnd  
 überfluß dieses vnser s nurren testament / sagt Pau-  
 lus zu den Römern / das so vn des einigen Adams  
 sünd wille / der tod geherschet hab / vil mee werdind  
 mir / so do empfangen habind die vile der gnad vnd  
 der gaben / herschen im leben durch einen Christum /  
 Vnd zu den Ephesern gebenediet er gott / das er  
 vns jm hatt angenam gmacht in dem geliebten sei-  
 nem sin Christo / an welchē mir habend die erlösung  
 durch sein blüt / namlich die vergebüß der sünd / nach  
 der rychtum seiner gnade / welche er überschütet hat  
 vff vns / durch Christum. Auch sagt vnser herr Chri-  
 stus selb / er sye kumen / das mir das leben / vn volkho-  
 mme

Gal. 3.

Gal. 4.

Ioan. 4.

Ewange-  
 lische über-  
 treffen.

Ro. 5.

Ephe. 1.

Ioan. 10



inne gnüge in jm haben sollen. Vnd also muß man  
verstorn / wann man von der gerechtikeit / von der  
volkomne / vnd von dem übertreffen des alten vñ nu  
wen testaments redē will. Vnd wirt also war / das so  
vil die seel übertrifft den leib / das leben den tod / der  
himmel das ertrych / salikeit die verdammus / so vil gere  
chter volkomner vnd überflüssiger ist das nūw gsatz  
dann das alt.

Nun sind vil der gschrifftegelerten / die dise aigen  
schaffen des heiligen Ewangelijs nit verston / **Eigennützig vffsatz**  
sunder wöllend die gerechtikeit / volkomne / nit by der  
übertreffendē gnad gottes / sunder by vile vnd schwe  
re der gsatz vñ rechnen. ja nit der gsatz gottes / das  
doch ein lydigere blintheit were / sunder deren gsatz / die  
sy vñ in selber on grund vñ vsachen erdichtē / gleich  
sam als die Jüdischen ordenslüte / vnd gschrifftegeler  
ten ouch thatē / denen die gsatz gottes zu vil recht war  
ren / mit denen sy nit gewinnen kunden / nach größe  
ihrer geitsucht / nit regieren das volck nach vile iher  
bösen vnd tyrannischen begirden. Darum schlugē  
sy die leer iheres schülmaisters Moysi hinder sich / vnd  
erdachtend vil nurwer eigennütziger vffsatz / die inen  
vnd iherē synagogischē reich quēmlich vñ erschüßlich  
werind / vnd zu sollicher schalckheit zochēd sy die wort  
der göttlichen gsatz / gleichsam / als ob von iheren gsa  
tzen wegen Moyses geret hett. Also da Moyses sagt  
welcher mēsch das gsatz hielt der wurd dar in leben / **Leuit. 18.**  
sagend sy / das / das lebē vñ iherē aigenfündē wer. Itē  
do Moyses sagt / das man ghorisam syn solt den prie  
stern / die do lertind die gepott von jm geben / die solt  
man ernstlich halten. **Deut. 14.** Namen sy die erstē wort / von  
c iii

der ghorſamkeit / vnd die letzten von dem ernstlich  
 halten / geschwigtend aber der mittlẽ wort / von dem  
 gepotten durch Moysen geben / vnd zochen solchen  
 spruch vff ire eigenfünd / vnd der gleichen warfend  
 sy sich selb / vnd ire erdichtung vilfeltig vff vnder dem  
 schin der gſatzẽ gottes / da mit sy dẽ volck ein grössere  
 forcht in stießend menschlicher ghorſamkeit / weder  
 göttlicher. Tu hab ich vor oben anzeigen / das vß den  
 gſatzẽ des alten testament / kein gerechtikeit ist / ouch  
 kein volkommenheit / vñ welcher noch vermeinte das er  
 müß vß den wercken des gſatz rechtfertig werden /  
 vnd nit vß dem luterem glauben der do ist in Chri-  
 ſto / der went sich ab von gott / vnd würt der gerecht-  
 keit Chriſti nit würdig / wie ich dan oben anzeigen hab  
 das vnser frumtheit / gerechtikeit / volkhonne / vnd  
 alles übertreffẽ der reichẽ himeliſcher gnadẽ / ſye al-  
 lein Chriſtus / welches so jemãds nit innerlich glaubt /  
 der ist aller warheit des heiligen Ewangeliums Be-  
 rourpt. Waß soll ich aber von denen ſagen / die gerech-  
 tikeit / nit vßerhalb Chriſto / in die werck der gſatzẽ  
 gottes / sunder in ire eigne ydiſche fünd ſetzend / die  
 doch nit allein mit den gſatzẽ gottes kein vergleich  
 nuß habend / sunder die durch das ewangelium vnd  
 die ganz gſchrifft allenthalb verworffen werdẽ / ſpre-  
 chend in dem neuen testament / ſolle mee volkomen-  
 heit ſyn / vnd die gerechtikeit des ewangeliums ſolle  
 übertreffen die gerechtikeit des alten gſatz / als dan  
 war iſt. Aber vnder der vnſſprechenlichẽ volkomẽ-  
 heit vñ gerechtikeit der gnaden gotz wöllend sy ire  
 vnſſprechenlichẽ gepreſten / vnd poßheit verkouffen  
 vnd beſchirmen / zuchend die ewägeliſchen gaben zu  
 pile vnſchwere der menschen pott / ſagend pillich vñ  
 geſchickt ſyn / das kein volkommer gſatz ſye / dann  
 das

Ewägeli-  
 ſche volkö-  
 ne iſt nit  
 in vyl men-  
 ſchen gſatz-  
 en.

das gsatz durch Chrustum geben / daruß sy in gegen-  
würtigem handel beschliessen wöllend / das die ee wir-  
ter / vnd in mee grad verbottē syn solle dann in dem  
altē testament. Ist das die pillicheit oder die geschick-  
licheit sol man die krafft des ewāgeliums / den gwalt  
des gloußens / die übertreffend gnad vnser erlösung /  
also nach vnser eigensinnikeit vsmessen: ist das / das  
übertreffen ewangelischer gerechtikeit / vil mensch-  
en gsatz machen / welche er selb sagt / sy syind nit vñ  
gott pflanzet: aber die art diser menschen ist / das sy  
nit Chrustum süchē / sind allein sich selb. verlögnend  
wol des ewangeliums nit / wöllend sich aber doch nit  
dar vff lassen / vermeinend eigne gsatz des menschern  
syind dannach ouch etwas / achtend ouch niemand  
für frum oder gerecht der die nit halt / vñ der sy halt /  
der ist vor jnen rechtfertig / als were er ein aller bā-  
ster Chriß / ob er gleich wol nit wüßte / wie Chrustus  
hieß / vnd wann man sy visach fragt solliches glou-  
bens in ire gsatz / antwurtend sy / wie doch Chrustus  
selb gsatz zū seinē apostel / er hette noch vil mit in zū Joan. 16.  
reden / aber er welt in den geist schicken 2c. Ist das  
der ewangelist Joannes selbzūgnuß geb / wie nit al- Joann. 2c  
le ding in dem ewangelio habind mügen begriffen  
werdē etc. Vñ also hab ich ouch alweg vermeint / die  
wyl ich noch bāpstliche gsatz / vñ die ding gloupt hab /  
jetzund aber wil ich Chrißto / vnd dem heiligen Jo-  
hanni ir eer widerū geben / dan ich find / das dem nse-  
nen also ist / sind soll vnd müß also verstandē werdē.

Chrustus do er wist / das sein zeit kumen was / Vflegung  
das er vñ diser zeit zū dem vatter gienge / die wil der wort  
er die seinen lieb kan hatt / lieber er sy biß an das Christi.  
end / darum er in dem letsten nachtmal / ein lange Joan. 16.

Ich hab  
noch vyl  
mit euch  
zu redē 2c.

predig zu in thāt / der gleichē theine vffertrych je thā  
ist / in der selbigen gab er inen zu lere vil himelischer  
leeren. Nämlich / wie das wort gottes / das er selb  
was / ein menschen reinigete von allen weltliche bez  
girden / wie niemand on das künd rein sin / oder gott  
erkennen / wie einer von dem anderen das selbig solt  
brüderlichen annemen / welcher das selb nit annem /  
der würd gots verreter / wie es tröste in aller betrüp  
nus / wie man darinn alle ding vermag / erlangt den  
heiligē geist / das man in kundschaft gots kumpt. Wie  
das wort Christi den glaubigen lieb habern alle ding  
erklet / wie die glaubigē müßend vil verfolgūg leidē /  
vff das der geist syn wurckūg hab in dem wort. Wie  
der selbig geist straffen würd vñ überwissen / die welt /  
die natur / vñ die vernunft. Welche dreü stuck nit wiss  
sen wöllend / das der vnglaub sünd / vnd der gloub  
die gerechtikeit / vnd das gericht gottes streng sye /  
sunder mit iren eignē wercken vnd erdichtunge wöl  
lind sy frum werde / darū er sagt / der geist würd die  
welt überzügen / von der sünd / von der gerechtikeit  
oder frumkeit / vñ von dem gericht oder verdammus /  
vnd deren wort redet er noch vil mit inen / vnd sagt  
darnach vnder anderen also. Zu den dingen hab ich  
euch noch vil zusagen / aber jr mügends yezund nit  
tragen / wan aber der künē würt / der do ist ein geist  
der warheit / würt er euch in alle warheit führen / dan  
er würt nit von jm selber reden / sunder er würt von  
dem meinen nemen / vñ euch verkündē. Wer wil nun  
vermeinen / das vnser herr Christus in denen himeli  
schen Worten seiner predig / ye solt gedacht haben an  
die theologiam der vier eigensinnigen / vnd zenckē  
schen secten / von welchen die Christenlich kirch vyl  
far

jar mit großem nachteil des ewangeliums geregirt  
 worden ist/ namlich der Occanistē/ Thomistē/ Sco-  
 ristē/ vnd Albertistē/ oder das er gedacht hett/ an  
 die vnussprechlich vile häpftlicher recht/ Decretal/  
 Sert/ Clementin/ Extrauagāten/ vñ der geschwol-  
 nen/ vnd widerwertigen glosen. Nun künden wir  
 doch ye kein gleichnus finden der jrdischen treüm/  
 gegen den aller heiligsten worten der predig Christi/  
 dann vylleicht in denen worten/ so er spricht/ wie er  
 vyl noch mit jnen zñ reden hett/ das sy jetz nit tragen  
 möchtend/ da müst Christus die bücher jetz gedachter  
 schribenten gemeint haben/ dann sy warlich schwer  
 gnüg vnd vntrāglich sind. Aber diß ist ein spöliche  
 warheit/ Christus aber vermeint/ er hett noch vyl  
 mit seinen junger zñ reden/ der glychen/ wie er voran  
 mit jñe geredt hat/ wie er dan ouch vff diß wort noch  
 weiter redet/ von bestendikeit des gloubē in der trüb-  
 sältikeit die nit langwürig sy/ wie sy von gott heiliglich  
 geliebet/ vnd von ym alle ding erlangen werdind/  
 wie sy durch nünt dann durch das vertrauen in das  
 wort gottes enthalten/ wie das selbig wort allein in  
 vil leiden eroffnet vnd erkläert werde. Wie man allein  
 durch diß wort in erkantnus kime götlicher ding  
 Mit vil anderen himelischen ermanungen/ welcher  
 so sy villeicht noch nit als ganz enpfenctlich waren/  
 sprach er/ sy möchtend die ding (die dan alle wir synd  
 von fleisch vnd blüt) noch nit ertragen. Aber nach sei-  
 nem sterben/ nach seiner vfferstentnuß/ vnd himel-  
 fart/ würdind sy geschickter dise ding alle zñ erkennen/  
 darñ wie wol er leiplich nit würd by jnen sein/ wele er  
 doch sy wissen vnd leren/ den weg der warheit/ durch  
 den geist/ der jm gleich warhaft sein würd/ welcher

Ir mü-  
 gends jetz  
 nit tra-  
 gen zc.

Vnmüg-  
lich/das  
bäpstlich  
recht vß  
dem geist  
gottes sye.

1. Cor. 1.  
14. 29.

Matth. 15.

kumen wurd/nit mit menschen chant vß aigen sunn-  
keit erdicht/sunder so er leeren vñ würcken/wurd er  
von gott nemē/vñ mit fleischliche/jrdische/aber geist  
liche vñ himelische ding fürgebē/ glychsam als Chris-  
tus ouch thon hat. Noch sind vil die schmechend die  
wort Christi/die er von disem geist also mit großem  
vnderscheid geret hat/vnd ziehend in vff fleisch vñ  
blut/vnd was sy erdichtend/das legend sy dem geist  
gottes zñ/vnd machend darnach ewangelische gsatz  
daruß. Vñ gleichsam als die Jüdische priester schafft  
ire eigenfund vnd dē gsatz Moysi/also verkoufend sy  
ouch die ire vnd dē ewangelio/dē selbē legend sy vnuol-  
komēheit zñ/sprechēd/so Christus ein teil deß geist got-  
tes den apostilen vorbehalt/denen er nit alle ding hab  
künden sagen/so hab durch der apostel nachkomen/  
ein ervollung müssen geschechen/darum das bäpst-  
lich recht ein teil sye deß ewangelium/das doch war  
sin/als vnmüglich ist/als/das Christus der ewig  
vnd warhafftig sun gottes ein betrieger vnd lugner  
sye. Dann/wie vyl ist in disen rechte/das allein die-  
net zñ rychtum vñ großem gwalt/wie vil würt dar-  
inn dem weltlichen gwalt entzogen/wie vil beschlies-  
send sy vß den heidischē gsätzen/die vor Christo vil jar  
gewesen sind/wie voll sind sy der vernüfft/die gott ver-  
derben vnd umbungen würt/wie vil hundert gsatz  
werden darin begriffen/die gegē dem ewangelio sind  
wie schwarz gegen wißem/wie sind si doch nünt an-  
ders dann menschen wort/mit denen Christus/wie er  
selber sagt/vergeblich vñ vn sunst geeret würt/vnd  
man sol sprechen/das die ding der geist gots geleert  
habt in ewikeit mag sölliche nit war syn. Wir habēd  
vor oben ghört/wie das ewangelii ganz voll ist heil-  
samer

samer leer/von auß der gnaden gots/true vnd liebe ge  
 gen dem nächsten/des selbigē erinneret vns der geist  
 gottes noch täglich/das selb ist das war geistlich  
 recht/nit vß dem menschen kopf/sunder von gott ge  
 nomen/dann je Christus selb sagt/das/den er schē  
 ctē wurd/dē geist der warheit/der wurd vns in alle Ioan. 16.  
 warheit leiten/vñ wurd nūnz von jm selber redē/sin  
 der von seinē himelischen vatter wurd er nemē/vnd  
 vns verkünden/vnd welches frum diener synd deß  
 geist gottes/die lassend sich ouch alzeit also findē/das  
 sy dē geist gottes kein jrdisch luginen/rychtū/gwalt/  
 heidisch sitten/weltlich philosophy/oder bāpstlich jū  
 ristry/zū legind/wissend das der geist gots nit an  
 ders lert noch je gelert hat/dann wie Christus selb/  
 der doch die ding alle wyt verwoisē. Da kumpt mier  
 nun ein doctor bāpstlicher sect entgegen/spricht wie  
 wol war sye wie jezūd gsagt/noch dannacht verlouf  
 find sich vil hādel vnder den menschen/die vß dem  
 ewangelio nit mūgind entschiden werden/vermeint  
 also vast not sein das bāpstlich recht/von wegen in  
 fallender hādel vffkumen sye. Daruff ich antwurt Nitt all  
 gib/das ein vnderscheid ist vnder den selbigē hādel/hādel mū  
 dann etlich sind zytlich/als rechtuertigūg der gūter/gend iß dē  
 straff der bösen/vnd der gleichen/die selbigen sollend ewangelio  
 nach der gschrift/von weltlicher oberkeit vsgespro:  
 chen werde/darnach sind etlich die man nach der ge:  
 schrift nit mag vßsprechen/werdend ouch von keinē  
 warē geistlichē recht zū gelassen. Namlich/vil pfrain  
 den habē/vnd keiner gnūg thūn/geistlich sein vnd  
 wāltlich leben/in namen der Christenlichen kirchen  
 kriegē/die vngleubigē mit todslachē vñ schatzung:  
 en zū Christen machē/vil gsatz erdichten/damit vil zū  
entschidē  
werden.

dispensierē sye/ in allē dingen gelt mee ansehen/ dan  
 not/armut/vn liebe. Inurias/ das ist schmachwort  
 oder werck (als so ich ein geistlichen dungen/ vnd der  
 gleichen) hoch vm gelt schätzen/ die menschē vm zeit  
 lich gūts willen bannen vnd töden/ dem sūnder mee  
 gelt dan biß vfflegen/ eemenschē zertrennē/ die gott  
 zu samen gfügt hat/gots gebott vm menschlicher vff  
 satz willen vil feltig übertretten/ vnd der gleichen  
 sind noch vil hundert handel/ die vs der gschafft kein  
 grund habend/ sind ouch den waren götlichen rech  
 ten ganz vngemes/ darum wol not gewesen ist das  
 von deren wegen ein ander recht käme/ darinn diß  
 handel beschloffen wurdind/ das man aber diß recht  
 dem ewangelio zu setzen/ vnd vermeinen die gschafft  
 sye on diß vnvolkomen/ das heist die heilig dry vā  
 tikeit schmechen vnd lesteren/ vons gott den heiligen  
 geist/ das er nach der verheissung Christi kumen/ die  
 ding solt gelernt habē/ die do got de almechtigē vatter  
 der da ist im himel/ vn den Worten vn wercken seines  
 einige vnd ewigen suns Christi Jesu/ offentlich/ mit  
 grösser verböserung Christenliches gloubens/ wider  
 wertig erfunden wurdind.

**V**onden gend/ das sy von dem heiligē S. Johanne sa  
 wortē Jo: ewangelio habind mügen begriffen werdē/ müssend  
 hānis am mir ouch der Worten des ewangelisten warnemen/  
 xx. vnd let dann sein meinung ganz nit ist/ wie etlich gschafft  
 lē cap. gogler da von redend. Er spricht aber also/ es sind  
 noch vil andere ding die Jesus thon hatt/ welche/  
 so man in sūnderheit schreibe/ vermein ich das es die  
 welt nit begryffen möcht die bñcher die da von gschri  
 ben



ben würdind. Item/dise ding (sagt Johannes) sind geschribē vff das jr gloubind das Jesus ist Christus ein sun gottes. In denen worten redt der ewangelist von den worten vnd wercken die Christus thon hatt/nit die langzeit hernach von den bāpsten vñ anderen geschechē soltēd. Auch zeigt er an/dise gschribē ding gnugsam syn zū glouben in Christum/welcher aber da von nit gloubte/der würd ouch nit geloußen/ob gleich wol alle wort vñ werck Christi/so er von jugent gerhon/Beschriben würdind. Noch dannache ist ein grosse vile menschlicher gsatz/vnd vngötlicher sante syen erwachsen/die man ein teil des ewangeliums nemen will/in welche so jemand nit gloubt/würt er als ein vnvolkomner Christ geachtet.

Aber in summa / die sophisten vñ bāpstlich juristen ziehend in einē farren/hangend an der gerechtikeit der keine ist / verstōd Christū vñ sein wort minder dan ein gans/verkerend ouch das selbig so mancherley weg / als sy Böser begirden habend / vnderstond sich gar nach alle wort des heiligē ewangeliums mit jren vnsinnigen glosen verfinstere vñ gar vm zū stose/vñ jr abgöttery an die stat setzen/als mir dan ghört habend/wie sy mit der ewangelischen gerechtikeit / vnd volkomne vmgond/das so Christus sage/es sie dann das vnser gerechtikeit bāsser sie/ dann der gschriffte glerten / vnd phariseer / mügind mir nit gon in das rich der himel/vermeindend sy Christus rede von gerechtikeit viler gsatz/vnd zeitlicher güter/welcher gerechtikeit sy mit jren vngötlichen rāten also vleissig zū hilff kumen sind/das die bāpstlich kirch wol acht mal so vil gsatz/vñ wol zehen mal so vil güter/als die Jüdisch kirch je ghept hatt/vñ lassend sich dannache

Wie die  
schuldor das  
wort Chri-  
sti vslegid  
Wach. v.

**Summa  
Syluestri  
na.**

deß nit benigē / sunder schemēd sich nit zū sagen / wie  
mir in der summa habēd / Syluestrina genempt / das  
die Christen nit allein den zehenden / sunder den ach-  
ten vnd den sybendē teil irer güter der priesterschafft  
schuldig syind / zūchēd dar zū die wort Christi / das vn-  
ser gerechtikeit volkōner syn muß / dan der Jüdischen  
gschrifft gelerten / oder mir werdind nit in das himel-  
reich künē. Das hieß recht zū zil gschossen. Das sind  
gwaltig consiliarij / die vns also die wort Christi vñle-  
gen kündind / das mir gelt vnd güt da mit überkū-  
mind. Aber es ist ein groß ellend die gschrifft also vn-  
nerschempt felschen / vnsern glouben vnd sālīkeit / die  
allein ist von dem einig gerechten / vnd frumen Chris-  
sto / zū geistlicher gELTSucht / vnd vntreglicher künde  
menschlicher vffsatz ziehen vnd biegen. Nun ist es  
doch ein vnlydenlich ding / so ein mensch dem ander-  
ren etwas zūlegt deß er gar nie / oder in ander weg  
gedacht hatt / wie soll dan erlitten werden / das man  
Christo Jesu zū leg / dar wider er mit Worten vnd wer-  
cken vñ allem synem lebe gewesen ist. Er lert vns / der  
Christen gerechtikeit solle besser sin / dan der gschrifft-  
gelerte vnd Jüdischen ordensluten / das ist / von gan-  
zem luterem hertzen sollend mir Christen sein / vnd  
gott dienen / nit mit einem vsserlichen schein / das  
mir gleich syind den gemalten grebern / welche vñ-  
wendig hüpsch scheinen / vnd synd aber inwendig  
voller todten pein / vnd alles vnflats / so kumend die  
gschrifft gogler vnd sprechend / Christenliche gerecht-  
ikeit sye vil gsatz machen / vil zins vnd gülden haben /  
vnd der gleichen / das nūnt anders ist dan Chri-  
stum mit seinen himelischen Worten widerum geis-  
len

**Matth. 23.**

len/krönen/verspuren/vnd Erüzigen/Vnd die al  
ler höchsten/so in der Chriſtenlichen kirchen als göt  
ter geſſen ſind/habend ſöllich vil jar gethon/vnd  
niemand geliebt/dann die jr vechſtenlichen gwalt  
zü güt/die warhaſtig geſchriſt/alſo mit diebiſchen  
vnd mörderſchen vſlegungen verrieth/vnd ver  
kufftind/die ſy dann ouch/nit allein mit dreißig ſil  
berner pfennig/sunder mit vil hundert duggaten/  
groſſen pſrainde vnd priuilegiē rychlich begabt ha  
bend. Aber mir wellen alle für ein anderen gott bit  
ten vm gnad/das mir die gerechtikeit/volkomne/vñ  
das überfließen vnſer erlöſung/in der warheit erken  
nind/vnd nit fliechind von dem rych gottes zü di  
ſer welt/von dem ewangelio zü einem anderen daſ  
ewangelium nit iſt. Vnd das ſye von der dritten vr  
ſach geſagt/ſo die ſchuld doctor in gegenwürtigem han  
del angezeigt/das die ee in vil grad verbotten ſyn ſöl  
le/dann die gerechtikeit deſ ewangeliums ſölle über  
treffen die gerechtikeit deſ alten geſaz. Folget ein  
andere vſſach.

Zü dem vierten zeigend die ſchuld doctor ein vſſach **Die viert**  
an/mit der ſy dann gemeinlich/vonuß wann ſy nit **vſſach der**  
weiter wiſſend/all jr ſachen beſchirmen. Namlich **verbotne**  
die Chriſtenlich kirch haſſ alſo vſſgeſagt/das die **ee.**  
ee in vil grad verbotten ſye/da vermeinend ſy das  
man nit weiter ſöll frag haben. Vnd wie wol wi  
der diſe vſſach vyl möcht ingezogen werden/wil  
ichs doch mit wenigen worten vſſrichten/vnd nit  
mee anzeigen/dann wie in den ſchüllen ſelb das  
von geredt würt. So man nun diſe frag fürhalt/ob

billich/das die ee in wyter grad/weder im alten gsatz  
 bestimpt/verbotten sye/macht einer ein sollich argu-  
 ment/Hieronymus spreche das im nünzt zu glauben  
 sye/er bewise dan sollichs mit der geschriefft des alten  
 oder nürwen testaments/daruf dan volge/das so we-  
 der vß dem nürwen/noch alten testament bewyft wer-  
 den müg/das man sich über den anderē grad vereen  
 solle/so sye zu halten das man sich vereen müg in al-  
 weg/so durch die gschriefft nit verbotten. Vff diß  
 argumēt/macht ein doctor herwider ein sollich schül  
 recht/vnd bekenē/war syn das man Hieronymo nit  
 gloubē solle on die gschriefft/vrsach aber des sye/dan  
 er müge nit vß der gschriefft bewisen/das er ein züg  
 sye der warheit. Aber es sye ein anders mit der kirchē  
 die müge sollichs vß der gschriefft dar thun/darum  
 was sy rede vnd sage/das solle als warhafft ghalten  
 werden/vnd müg kein gleichnus Hieronymi zu der  
 kirchē syn. Nun vß den argumentē zweyer sophisten  
 sollend mir drü ding lernē. Zum erstē/wie diß volet/  
 so lang es die gschriefft kert vnd verkert/das es dan  
 nach im selb/gschwigen anderen menschen nit gnüg  
 thun kan/wie mir dan hörend/das sy wider ein ande-  
 ren sind/einer mit der kirchen/der ander dar wider/  
 wie wol sy Hieronymi halb einhellig sind/das man  
 im gloubē gebe/so er sin red vß dem alten oder nürwe  
 testament bewise/daruf mir zu dem anderen lernē  
 sollend/das die altē vätter habend mügen irren/dar-  
 um inen noch jemandes zu glauben ist/dan mit zug-  
 nus der gschriefft/dann wie wol Hieronymus ein an-  
 geneher vnd geschwomer doctor der kirchen ist/  
 noch dannacht bekennend die schül sächter selb/er  
 müge vß der gschriefft nit bewisen das er ein züg der  
 warheit

Wie den  
 vättern zu  
 gloubē sye

warheit sye/darum jm nit zū gloubē on gschrifft/dar  
nach zum dritten lernen wir/das die kirch vñ der  
gschrifft/vnd nit die gschrifft vñ der kirchen ist/dann  
junt möchte die gschrifft der kirchen kein zūgnus ge-  
ben/daruf dann volget/das alles so sy vffsetzt vnd Die war  
ordiniert nach der gschrifft vñ der sy ist/das soll als kirch vñ  
warhafft ghalten werde/wo aber etwan ein andere vñ mit 8  
kirch were/die fürgebē wele die treu vñ gsicht jres gschrifft.  
hertzen/das dan die gschrifft an vil orten verbüt/der  
soll man nit glouben/wann dann zū mal wurd die  
gschrifft der selbigē kirchen/vnd also wider sich selb/  
kein zūgnus gebē der warheit/dann je die gschrifft  
vnd das wort gots/vor der kirchen gewesen ist/vnd  
niemand weist wo die kirch ist/dann wo die gschrifft  
vnd das wort gottes/welches wort nüt würckt/es  
hab dann etwas gegenwürff in dem es sich übe/wo  
es sich nun übe/ja in welchē sich die menschen üben/  
da selbig ist ein Christenliche gemein/Wo aber das  
wort/der gemein/vnd nit die gemein dem wort  
vnder woiffen/da ist vnmüglich/das ein Christenli-  
che kirch oder versamlung sye/dan die war Christen-  
lich kirch gar dem wort nach/von dem sy jren stam-  
men vnd namen hatt/schempt sich deßselbigen nit/  
lat seine ordnungen vnd gsatz beleiben/thut nüt hin  
zū noch dar von/wycht nit da von/wed zū der linckē  
noch zū der gerechtē/vñ alles das sy von nūwē sätzt/  
das sätzt sy nit nach eignē/sunder nach dem verstād  
vnd willen deß wort gottes/der alweg in jr ist vnd sy  
in jm/gedenckt nach keiner rychtum/nach keinē ge-  
walt/hatt kein land noch leut/krieger nit/schlechte nie-  
mand zū tod/redet niemand übel dann den halbsfar-  
rigen verblenten veinden des crūz Christi/statt ouch

mit vff hundertē/ tusenten/ vff ordens leuten/ pfeister/  
leyen/ wyb oder mañ/ sunder vff andächtigen gotes  
fürchtigen menschen/ die Chrustum vñ sein wort glou-  
bend/ die selbig kirch irret nit/ dan sy die gschafft jres  
einigen meisters alzyt an der hand hatt/ darüß was  
durch sy gesezt/ das soll billich als warhafft ghalten  
werden. Alles das aber die geschafft nit an der hand  
hatt/ das würt lugnery syn/ dan weder die geschafft  
noch die Chrustenlich kirch/ dem selbigen kunschafft  
der warheit geben würt/ wie mir dan in gegenwürti

**Merck** gem hādel clarlich verston müge/ namlich/ die kirch  
wie sich die ist vñ dem wort gottes/ das mag kein chrusten mensch  
kirch gegē abred syn/ so volget hieruß/ das alles/ so das wort  
d gschafft gottes leert/ gebüt/ oder verbüt/ dz müß von not we-  
halt.

gen die kirch ouch leeren/ gebieten/ vnd verbietē/ dan  
sunst würt es nitt ein Chrustenliche/ sunder ein ender-  
chrustenliche kirch syn/ die dem wort gottes hāssig ist/  
**Math. xij.** nach dem vñ Chrustus selbs sagt. Wer nit mit jm/ der  
sy wider jm/ vnd wer nit mit jm samle/ der zerströwe.  
Das wort gottes aber verbüt/ das wir jm etwas zñ  
legind oder von thügind/ so müß söllichs die kirch (so  
warl ich vñ dem wort ist) ouch verbieten. Das wort  
gottes gebüt vatter vnd mütter zñ verlassen/ vnd vn-  
sern ewibern anhangen/ so müß die kirch söllichs  
ouch gebieten/ Chrustus leert/ was gott zusamen fñg/  
müge der mēsch nitt zertrennē/ so müß die kirch ouch  
also leren. Die geschafft erzelt all personen denen ver-  
botten ist sich zñ vereen/ so müß die kirch die selbigen  
ouch erzelen/ vnd wo by es die gschafft beleiben lat/  
by dem müß ouch die kirch beleibe lassen/ dan sy ist vñ  
der geschafft/ vñnd vñ dem wort gottes/ welchem die  
wyl sy nach kumpt/ so ist sy ein rechte Chrustliche kirch

Die nit irren mag/daruff daß vnüßwinnlich volget  
das die kirch/so den gesatz gottes hinzü thut oder  
von nimpt/gebüt vnser eewyber verlassen/vnd irer  
eigen sündē anhangē/zerrēt was got zusamē fügt/  
sich der verbotnen personen nach der geschafft nit be  
nügē lat/die selb kirch/sag ich/kan vnd mag in kein  
weg götlich oder chüstlich sein/dan wiewol sy den na  
men Christi hat/will sy doch seiner wort vnnnd werck  
nit. Vnd so vil sie von der vierten vrsach gesagt.

Jetzunt haben wir nun vier vrsachen gehört/wa  
rumb die ee in vil grad verbotten sein solle/zum erstē  
das es nüzlich/zum andern geschickt vñ billich/zum  
drittē das euāgelisch gesatz solle vollkommer vñ gere  
chter syn dan das mosaisch/zum vierten/das on nor  
vil vrsachen an zū zeigen/dieweil die kirch sollichs al  
so vffgesetzt hab.

So wir aber verständig was disse vrsachen für ein  
grund haben/setz ich hie ein solche bschlusfred/**Ein Be**  
menschen gesatz das vor gemelter od gleicher gestalt **schlusfred.**  
die ee verbüt/hat kein gegrünzte vrsach/ist ouch nit  
anders dan der eer gottes nach/ein vergebner siner  
gestalt vñ der geschafft nach/ein hoffertiger/wanck  
elmütiger vnd geletsüchtiger eygensund.

Von den vrsachen ist vor oben gnüg angezeigt/  
dß es aber zū der eer gottes nit diene/haben wir an Vergeb  
allen orten do die geschafft wider die menschen ge  
ner dienst  
satz ist/ wie sie dann allenthalb/wiewol Esaias des menschl  
ein einiger vñ gnügamer züg syn mag/so er spricht/ cher gsatz.  
e ij Esa. xxix.

mir dienend gott vergeblich/das mir leerind der mē-  
schen leer vnd gepott / welchen spruch Christus auch  
anzücht/des halb niemand darwider reden kan/vnd  
ob gleich wol vil mensche gsatz/nit wider die gschrift  
odß liebe des nächsten erfindē werde/noch dannacht  
sind sy der eer gots nach vm sunst / dann so gott die  
warheit/vnd ein geist ist / will er ouch in der warheit  
vñ im geist geert syn. Welche nun Christus syn wellēd/  
die söltend fry vffrecht ym geist da her gon vnd gott  
mit einem frumen hertzen vereeren. Aber vnser vil  
wissend nit / vnd wöllend nit wissen wie mir also zu  
hohen vnd himelischen dingen geschaffen sind/wöl-  
lend vns nit dapfer vffrichtē /sind alweg vff der erd  
kriechen/vnd die ougen wie ein dieb vnder sich schlas-  
chen / so wissend mir ouch gott nit anderst züereen/  
dann mit jrdischē/diebschen/vnd vnwaren Worten  
vnd werken.

Das diß menschen gsatz / seiner ggestalt nach / ein  
hochmütiger eigen sind sye / das ist von im selbst offen-  
bar/die wyl sollichs/den gsatzē gots wid die gschrift  
hinzüthun ist / gleichsam als were sy sunst nit volko-  
men/wañ nun ein hoffart ist / sich über den nächsten  
hochmüt menschen erheben / was hoffart wirts dan werde / so  
menschlich ich mich über die gschrift vnd gottes gsatz erheben/  
cher eigen vñ die selbigen mir / vnd nit mich inen vnderwerfen  
sind. will: es wirt nit ein geringe hoffart syn / sind gleich  
dem Lucifero / der weit begeret über gott zu stigen.  
Ein Christen mensch der do erkent/das er nit von im  
selbs/sunder von gott hie ist / des halb er in warhaff-  
tichlich vñnd im geist lieber / der lat vernufft / werck/  
eigne



eigne krafft/leiplich vermügen/vnd alle ding hin fal-  
 len/vnd setz sich mit Magdalena/nit an die seiten/  
 sund zu den füßen des wort gottes in höchster demüti-  
 keit/spricht alweg wie im Psalmen geschaußent stat. Psal. 118.  
 gott leer mich den weg deiner gsatz / so will ich in ene- Nur mein  
 lich behalten/mach mich verstendig/so will ich behal- er.  
 ten din gsatz in ganzem hertzen. Aber ein vnchristen- Nur das  
 licher mensch/der lat syn vernüfft überlousen / farr mein.  
 herfür in grosser hoffart/vermeint es müge nit also  
 schlecht mit den gsätzen gottes vsgericht syn / es ge-  
 hör noch weiter darzu/handelt in allen seinē worten  
 vnd wercken nit anders/dañ wie die Jüdischen pha-  
 riseer/tringe herfür ouch in gegenwürtikeit Christi/  
 damit er zu tisch vnd in der schül/oben an sitze /will Luce 14.  
 ein grosser rabbi genempt/vñ vff dem marck gegrüß- Matth. 23.  
 set syn/halt gar nit weiter von Christo/dañ als von  
 eins zimmemans sun/Vnd derē glyser synd vil in  
 der Christenlichen kirchen lang zyt gewesen / die mit  
 grossen hochmüt gott vnd seine gsatz hinder sich ge-  
 stosen/vnd sich selb herfürzogen/glychsam als ob die  
 kirch on menschliche hilff mit der gschrift nit möcht  
 geregirt werde / vnd als ob irdische vernunft jnen  
 darum geben were/die gschrift zu bruchen vnd zu ve-  
 teilen/nach jrer stolzen sinnlicheit. Nun mügend mir  
 doch als menschen nit sagen/das Christus Jesus ein Matth. 16.  
 sun gotz sye /wie wellend mir dann als menschen re-  
 gieren die geschrift vnd die kirchē / so do beide alein  
 stond/uff Christo Jesu einem sun gotz. Aber die gleis-  
 ner erkennēd gott nit/habē zu vil mit jn selb zu schaff- Wie die  
 fen/achtend nit (nach den worten Pauli) das si gotz menschē/  
 tes ein wißē tragind /darum gibē er jnē verkertē sinn also ouch  
 zu thun das vngeschickt ist/freueler/hoffertig/stolz/ yre gsatz.

vngehorsam/ vnbarmerzig. Alles das von disen  
menschen vffgesetzt vñ gehandelt wirt/das muß vñ  
nöten ierer natur nachschlachē/ vñ alle menschen ge-  
satz/die mit got vñ seiner geschüfft nie beston müge/  
die finden wir gemeinlich also/dz sy hoffertig/stolz/  
vngehorsam/vnd vnbarmerzig sind/süchen allein  
was dem menschen/nit der seel wol kumpt/vermeine  
ouch es solle gar nit gehandelt werden/das sy nit zu  
lassen/vnd so einer etwas der geschüfft nach einvel-  
tlich/wider iere hoffart handelt/würts jm weniger  
nach gelassen dann keinerley gonglesterung/ also bla-  
sen sy sich vff/vnd überheben sich für alle ding.

Das men-  
schen gesetz  
ist wackel-  
mütig.

Weiter das diß menschen gesetz ein wandel müti-  
ger vñnd ein gitiger eygenfund sey / das ligt am tag  
wie der pur an der sunnen/darum vyl zügnis on not  
ist/dan das wir daruß lernen sollen diß gesetz/ wie  
ich vor ouch angezeigt hab vngödelich sein/ dann wo  
da etwas gleichnuß were mit den waren gesetzen got-  
tes/würdt es sich nit also lichelich umbstoßen lassen/  
die weil es aber menschliche willen vnderwoffen/ist  
kein wunder/das es ouch also wie der mensch vnbe-  
stendig ist vnd gitsüchtig/darzu wurd es nit also vñ  
gelt verkaufflich sein/dan got kein büchstaben seines  
worts verkaufft/sond gibts vmb sunst/ Befilche auch  
vns/das wir vñ sunst gebind/darum ouch.s. Peter  
Simonem verdampt/das er das hend vfflegen der  
Apostel vmb gelt kauffen wolt/ sprach sein hertz were  
nit vffrichtig vor got/er were vol bitter gall/ vñ ver-  
knüpft mit vngerechtigkeit/ists dā also vnrecht das  
gelt vñ die gabe gottes dar gebē/wie vnrecht würts

Matth. x.  
Act. viij.

die selbigen on gelt nit mitteylen/aber der teüfel hat  
 disse gschriffte ouch vmb gestossen/dann wie der hei-  
 lig Petrus ein vrtail der verdammuß geben hat über  
 den kauffer der gaben gottes/also würt jczundtan  
 die benedeyung den kauffern/vñ die maledeyung denē  
 die nit wellen/od ouch die nit mögē kauffen/gegebē/  
 dan mügen hin mügen her es muß gemügt sein/oder Hilff erwi-  
 vermaledeyt/das vñ kein anders. Hette nun der hei ger got.  
 lig apostel Petrus disse vnbillichen handlungen der  
 künfftigē zyt erlept/er würd vns on zwifel nit allein  
 als voll bitter gallē/sonder als voll teüfel verdampft  
 vñ verflucht haben in alle ewigkeit/vñ wo er an dem  
 wort vnd gabē gottes hette wellē ein freueler werdē/  
 so wer er doch frilich ouch wol reich vñ gwaltig wor-  
 dē/sein hertz aber ist vffrichtig vñ verknüpft mit gotz  
 forcht gewesen/darumb er von Simone kein gelt ne-  
 men wolt/schämte sich ouch nit selb zū bekennen/das Act. iij.  
 er weder silber noch golt hette/wolt also ein exempel  
 vortragen seinen nachkömen/wie er sy dan auch trü-  
 lich ermanet in syner ersten epistel/das sy die herden j. Pet. vl.  
 weyden vñ versehē sollen/nitt vñ schenelichs gewins  
 suche/sonder vñ geneigtem gmit/nitt als herscher  
 über das erb/sonder als gute fürbild der herde. Aber  
 es ist leider darzū kömen das nitt allein der heiligen  
 apostel leer vñ exempel/sonder auch die aller götli-  
 chsten wort vnd werck Christi/nit me fürkumen mü-  
 gen/werdē in all weg nit anders gehalten dan nach  
 dem sprüchwort/als käme einer vñ bracht vns nit/  
 vnser eigne erdichtungen aber die liebē mit/dan sy  
 sind vnser natur/hoffertig/freuel/wäckelmütig/ge-  
 rig/süchēd allein sich selb/nit got od sein wort/thünd

niemand nüt vergebens / zwingend vnd bindend dem  
nächste mensche / also das im ouch nit essen noch trink  
en nach gelassen on ertouffte erloupnis / wie dan diß  
gsatz von der verbotnen ee / ouch eines ist .

Also wil ich jetzund anzeigen habē / wie diß mensche  
gsatz kein gegrünzte vsach hab / wie die gschafft dar  
zu gefelschet sye / wie gott kein eer / ja vneer damit be  
weisen werd / dan es ist wiß syn gsatz vñ liebe des näch  
sten. Item wie es ein hochmütig gsatz sye / daß sich  
nie demütiget vnder den willē gotz. Item wie es wan  
ckel mütig sye vnd gelt lieb hab etc. vñ wie voll noch  
vil eigēschafften mer / sind doch derē iezmal gnüg .

Die schubt mir nun ein prelat mit eigener hand /  
aber vilicht durch ein vorschreiber / dem die welt ouch  
näher dan die liebe gotz vnd des nächsten angelegē /  
warnt mich in gutem / deren ding still zúston / dann  
diß vnd der gleichen handel dienend zú ergernus der se  
len / ouch zú verachtung der oberherrē / vñ das sind /  
wie etlich vermeinend / zwo groß inreden / werdend  
ouch vil einfeltiger pfarhern / die sunst dannacht ein  
Chriſtenlichen willen hettind / durch solche abzogen .  
Aber es sind nüt / dan gemalte wort / vff die gar nünt  
zú halten .

Ergernus  
gebe oder  
nemen.

Dan von ergernus zú redē / will ich mich alzeit vlei  
sen jemandes kein ergernus zú geben / ob aber etlich  
von Chriſtenlicher handlung ergernus nemend / da  
kan ich nit für / dan ouch Christus der gſtalt ergernus  
geben hatt / ja ein ydelich Chriſtlich wort oder werck  
ist by gotlosen mēſchen ein ergernus / vñ vnchriſten  
liche wort oder werck haltend sy doch für kein ergernus /

nus/verschach ist/dan sy sich selb in allweg lieber haben  
 weder got/darumb was mit jnen wider got ist/achz-  
 ten sy keiner ergernus/ was aber mit got wider sy /  
 da ergeret sy sich gar grösslich/also/ das so bald einer **Ergerung**  
 Chrustum oder die geschuffte wider sy nur mit einem  
 wort ouch warhafftig anzeigt/ist er von stund an er-  
 ronens/scandalosus/piarū aurū offensiuus/das ist  
 er irret vnd verbösset die einfeltigen/ also acht man  
 keiner ergernus/so ein pfarrer ein gorlesterer ist/ein **Besserung.**  
 kriegs man/ein offenlicher spiler/so er frummer lütē  
 kind mit gwalt vorhalt/so er mit vnreinen worten vñ  
 wercken syne vnderthonen täglich verfür/ dan sol-  
 lichs trifft gottes eer an/so bald aber nit me dan ein  
 banschaz pfennig ab gat/von stund kan man in nit  
 erliden/dan das selbig trifft sy an. Also ouch in gegē-  
 würtigem handel die vereenigen gödlich geschehen/  
 vñ menschlichē gsatz wider got zertrennen ist für kein  
 ergernus geachtet/ aber vñ gödlichem gsatz wider  
 den menschen zūsamē fügen/das soll ein grosse ver-  
 böserung sein. Nun will ich das wort gottes vñ frum-  
 me chrustē mensche zū richter setzen/welches die gröss-  
 set ergernus sye vnder den zweyē. Ich sag also/liebē  
 fründ/jr haben ein anderen mit got genommen/das jr  
 aber widerumb von den menschen gescheidē/das ist  
 wider Chrustum/vnd syn warhafftig wort/das sagt/  
 was got zū samē fūgt/mūg der mensch nit zertren-  
 nē/darumb erken ich ūch on allē zwifel als eeleūt vor  
 got. So spricht das Chorgericht also/diweil die sib- **Des Chor-**  
 schafft/gvatterschafft/oder was des gleichen ist/hin- **gerichts**  
 derung der ee gnūgsam dar gethon ist/erkennen wir **viteyl.**  
 das die parthyen/so sich allein de facto vereet/einan-  
 der nit haben mūgen noch sollen. Darnach spricht  
 f

Das soll  
Besserung  
syn.

der procurator/nun wolan jr sind mit vteil vñ rechte  
gescheiden/aber wan iich not zu samen wer/möchtē  
jr mit .x. oder .xx. ducatē gen Rom werben/das rechte  
ablösen. Da will ich ein christlich hertz vrtailē lassen/  
was recht oder vnrecht/ergernus oder nit ergernus  
sye/vñ sind ouch der glichē ergernus noch and meer/  
namlich/das in vil stettē teütscher nation/Römisch  
grempler sitzend/denen gwalt gebē ist sollich dispen-  
sation zu verkouffen. Item so die grempler nit zu hā-  
den/das sunst ander teutsch verkouffer sind/die .xx. o-  
der .xxx. gulde von parthyē nemend/sprechend/die di-  
spensation wellind sy in bestimpter zit gewislich ero-  
berē/wan nun die zit verlossen/vnd die parthien kün-  
mend/vermeinen die sach vñ gerichte sin/so ist etwan  
der bot mit dem gelt vff der strass nider gelegt/etwan  
wurt es in vier jaren durch den banck nit gefertiget/  
etwan so ist des gelts nit gnüg gewesen/vñ müß man  
.x. oder .xx. gulde für überwechsel vnd trinckgelt dar  
zu gebē. Item wie groß ellend ist/so ertlich eemenschē  
v. vij. x. jar by einander gewonet/dar zu .viij. ix. kinder  
gehept haben/darnach wurt ein hinderung mensch-  
liches gesatz/glich so bald vñ falscher zügness als vñ  
warheit erfundē/so sy dā ire seelsoiger deßhalb rats  
fragē/so wissend sy me von luginen dan von dē wort  
gottes zu reden/vñ wysen die armen eelüt zu den vor-  
gemelten grempler/die forderen dan etwan vyl ducatē  
ten/da geschicche/das etwan die einseltigē menschē  
das gelt mit grosser beschwerd vffbringend/vnd bez-  
zalend/so erkent man dan mit rechte/dz sy vorhīn vñ  
erlich/aber hinsūr erlich bywonē werdind/vnd ver-  
meinend die eelüt dem sy also/vnd bekennend sich als  
die vorhīn alzit mit einādern gesündiget haben/also  
beschwert man die armen gwislinē. Etwan sind sy

Das sind  
stattlich  
pfarrer.

aber nit so einfeltig/vermeinent die ee werd jnen vn  
 billich verbotten so dem verbott mit gelt gnüg thün  
 werde müge/wellend also keiner dispensation achtē/  
 so sind darnach die pfarrer also vnchristlich/das sy  
 sölich eelüt nit absoluieren noch die sacrament mit-  
 teilen wellend/ja verklagend sy gegen jren weltlichen  
 oberherren/so lang biß man jnen vß dem doiff püt/  
 damit werdend sy zwungē ein ander zū verlassē/ob  
 sy glich wol.xx. jar Bygewonet hetten/daruf dan vol  
 get/das sich das wyb nimer so wol vereen mag/die  
 weil man spricht/sy sye durch jren fründ einē Beschla-  
 fen/da ist sy jres junckfröliche standes beroubt/vō dē  
 eelichen ist sy zertrent/vn jr witwen stand wurt ver-  
 achtet/ja das noch kläglicher ist/so müßend die kind  
 vneelich/vnnd also ouch vnerblich beliben/wan das  
 nit ergermus sind/so ist on zweyfel kein ergermus vff  
 ganzem erdrich/Ja wan zū jetzigen zeiten ettwas  
 übel endstat/vngewitter/thürē/krankheit/krieg/  
 vnd der gleichen/sagend etlich von den Luterischen  
 sin/vnd sind doch die übel gewesen ee vnd die Luteri-  
 schen geporen/ist aber gewißlich zū gloubē/das alles  
 übel allein kumpt von den öffentlichen verachtungē  
 der gsagen gottes/vn vnchristlichen böserungen ge-  
 gen vnsern nächsten/also das ouch zū wartē ist/das  
 vns got vnder die heiden ströwe/biß vns das land vn-  
 serer vnd ganz fresse/dan wo mir arm lüt/witwen/  
 vnd weysen also verletzend/hat vns got vor gesagt/  
 das sy zū jm schreyen werdind/vnd er werd jr geschrey  
 erhören/vnd sein zorn werd ergrimme/vn vns schla-  
 chē mit dem schwert/vnd vnd vnserē wyb vnd kind  
 ouch zū armen witwen vn weysen machen. Das wil  
 ich denen geantwurt haben/so mir ergermus der se-

Kein er-  
 gernus.

Alles übel  
 vō warer  
 ergermus.  
 Leui.xxvj

Exo.xxij.

len zulegen / dan alles so ich by mynen vnderthonen  
gehandelt / das hab ich thon vñ gehorsamkeit der ge-  
botten gottes / hab wellen bliben lassen das got blibe  
Nu. xxiij. lat / mit dem propheten Balach nitt wellen maledycken  
das got benedyet / hab kein gesellschaft haben wellen  
Lzech. mit denen / die gelt vñ sold nemēd wirtwē vñ weysen  
xx. iij. zu meeren / vñ die seelen zu versclunden / sunder hab  
die sünd wellen fürkōmen / vñ die meinen von vnbill-  
keit menschlicher beschwerden ringeren vñ erlösen  
wellen mit chriſtenlicher warheit

Verach- Darnach das mir von verachtung miner oberher-  
tung der ren für geworffen wurt / das hat eben den grundt /  
oberherrē den ich von der ergernuß anzeigt hab / dan mir süch-  
en in allen dingen / allein vñs selb vñ nit Chriſtū Je-  
sum / darumb was mit vñs wider Chriſtū iſt / das hal-  
tend mir als erhaſſtig / so aber etwas mit Chriſto  
wider vñs / das alles iſt verachtung vñ vnghoſam-  
keit / nun der ewig got wurt mein züg syn / ob ich das  
oder anders zu verachtung meiner oberē gehandelt /  
dan als mein vnderthone mit fründschafft zu beyder  
syten / mich der verecung halb angelangt / hab ich sy  
dannacht by drey monet vffzogen / mich wol zu beden-  
cken / vñ wie wol ich in mir selber geloubt / diß men-  
schlich gBott in dem val nit syn / noch dannacht wolt  
ich nit vff mich buwen / darüb ich vmb wonders wil-  
len dißem gſatz vlyſſiger nach ſtudiert / biß das ich er-  
lernet / alles / das ich in diſſer meiner information an-  
zeigt / daruff ich sy dan zu ſamen geſügt / vñ nit vñ fre-  
uel oder eincherley verachtung. Ja witer / wan sy nit  
arm lüt gewesen werind / het ich jnen onzweifel gera-  
ten ein dispensation zu eroberē / vñ sy getröſtet mit  
j. Pet. ij. den Worten des heiligen Petri / dz mir gehorsam ſein



sollen den herrē in aller forcht/ nit allein den gütigē/  
 sinder ouch den vngeschlachten/dan das ist die gnad  
 (spricht Petrus) so jemand vmb des gewissen willen  
 zu got trurikeit verterege vnd lydet mit vnrechte/Dar  
 vmb ob mir glich wol wissend/das in dem val/ ouch  
 anderē/gelt von vns nemē vnrecht ist/sollē mir dan  
 noch willig ghor[sam] sein/damit mir mittsampt den  
 vnschlachtigē herrē/nit gitiger vngehor[sam]keit/wie  
 sy gitiger oberhād /anklagt werden/wo aber armūt  
 ist/da sol alle menschen helffen vnd raten/dan so das  
 gesatz gottes/darin die ee nach gelassen/durch men  
 lich that/vmb gelts wegen wider die gschafft hinder  
 sich gestossen würt/so soll ouch vyl me das menschen  
 gesatz/darin die ee verpotten/durch götlich that/vm  
 barmhertzigkeit wegen mit der gschafft widerumb  
 hinder sich gestossen werden/damit was dem richen  
 mit gelt/das dem armen on gelt vñ gnad nach gelas  
 sen werde. Vñ also Bewilligen ich mich aller ghor[sam] Gehor[sam]  
 keit so vil lyb vñ güt antrifft/ aber so vil die seel/liebe me erbie  
 des nechsten/vñ das wort gottes antrifft/do kan we tung.  
 der ich noch ein ander Chrusten mensch Bewilligen ge  
 ho[sam] zu sein/denen/so vns davon ziehē wellen/sin  
 der sollen sy verachtē/vñ wie Chrustus sagt als Blind Matt.xv.  
 menschen faren lassen/sunst will ich meins teils nie  
 mands/ouch die wenigst creatur/nit verachten.

Tum das ich ein end daran mache/solte ich Billich  
 ein ermanung thün zu allen pfarrern/vnd anzeigen  
 wie so vil schwerer spruch in der gschafft wider jr hin  
 lässigkeit angezeigt werden/herwiderum/wie jr trüw  
 vnd liebe gegen den Beuolchnen schäfflin so hoch be  
 rümpt würt/wie sy erkennen sollen das alles so von

guten vnd bösen bischoffen/apostelen/hirten geschriben stat/dz solliche (wiewol nit nach jetzigem brauch) aber nach der warheit sy antriffte/wie sy sich nüt soltend abtreiben lassen das sy got nitt für alle menschen forchtend/das sy sich kein zülich ding an dem dienst gottes/vnd liebe des nächsten hinderen ließend/das sy gunst/gnad/haß/schmach/richtumb/armut/sterben/lebe/vatter/mutter/woyb/kind/frütschafft/vñ die ganz welt mit allem irem glück vnd vnglück verachtend/vnd sücheind den einigen vñnd war rychen Christum vnd sein wort. Aber ich will es jetz da by bleiben lon/doch sy all vmb gottes vñ liebe des nächsten willē bittē/das sy dis mein information brüderlich leßend/vñ darnach mit iren vnderthonē handlind wie sy vermeinen gegen got zu verantwoitē/wellen ouch mein schreiben für güte von mir vffnemē/dan wie wol ich vilicht geschwigen haben solt/vnd ander da von lassen reden/so hab ich doch by meinen lieben vnderthonen/der sache halb besunder also vyl beschwerter gewissen vñ groß anligen erfahren/das ich mich nitt hab mügen enthalte/hab sollich vñ keiner natürlich en liebe oder feindschafft gethon/sunder vñ Christenlicher begind/damit all pfarrer wissind was grund diß menschen gesatz hab der verbotnen vereenungen/vnd ob vilicht etwan frum/geistlich od weltlich oberherren werend/die in was weg sy möchten/das bāst thäten/damit ire vnderthonen nitt also vngölicher wys beleydigt wurden/dan summa summarū/man scheider die celüt mit vteil vnd recht/darnach dispen siert man/das ist/man nimpt gelt vnd erkent vrtcyll vnd rechte vorgehen nüt gelten/vñ also vnrecht sin/vñ das sol dan ouch recht sin/dz doch vffs aller höchst

vnrecht ist. Item on alle jnred muß deren eins war  
sin/das so diß vnd der gelichen menschen gsatz vß got  
sind /volgetdas vyl hundert verecungē durch dispen  
sation wider got nachgelassen werden/sind sie aber  
nit vß got/warumb halt man sy dan vnd zertrent die  
armen lüt vnd beschwert sy an lyß vnd güte vnd jeren  
gewisnen also vnridenlich. Der teüfel thüt aber der  
vnderstat sich alle vngötliche ding götlich zū ma  
chen. Nit me dan der ewig sin gotes Christus  
wöll allen Christen menschen gnad geben/  
die welt mit allen jren bilden christen  
lich zū überwinden.  
Amen.









